

愚

齋

存

稟

愚齋存彙卷第六目錄

奏疏六

請將何嗣焜學行宣付史館立傳摺

蹕路電線工竣援案請獎摺

電線請獎清單並附

請保孫寶琦王國楨片

請卹張毓樹片

賞加太子少保謝 恩摺

南洋公學推廣編輯政書摺

請設商務學堂片

朱李氏捐振請准建坊片

補授工部左侍郎謝 恩摺

盧保鐵路工竣先將官款造銷摺 鐵路收支簡明清單並附

請減輕茶稅摺

愚齋存彙卷第六

奏疏六

請將何嗣焜學行宣付史館立傳摺

光緒二十七年十月  
南洋大臣劉

會奏

奏爲故員學行允孚總理南洋公學積勞病故懇

恩宣付史館立傳恭摺仰祈

聖鑒事竊維史編所錄原期收風世之功士論方濬尤

宜正觀型之本臣宣懷自光緒二十年奉

命督辦鐵路會同王文韶張之洞奏調三品銜分省補

用知府何嗣焜派充鐵路參贊二十一年與臣坤一互

相討論奏設南洋公學以參佐擘畫必需明體達用之才復經奏派該員兼充南洋公學總理數年以來鐵路之工費公學之規模考覈鉤稽權衡施措靡不中於事理而於公學之營造法式教育章程尤爲該員心力之所專竭二十六年冬臣坤一奉條陳新政之

命電調該員至省用備咨訪該員卽屏除人事盡陳中西政書閉戶精思恆至澈夜類聚條錄之事甚多至本年正月十二日方據案屬稿擲筆遽絕臣宣懷失此臂

助傷痛固不可言臣坤一駭聞此耗亦以中國失此有

用之才而微臣未獲罄其欲言之要爲可惜也伏查該

員何嗣焜江蘇武進縣人同治初年以諸生從淮軍轉戰蘇常之間由大學士李鴻章敘勞保訓導教諭光緒五年以廣西平李揚才功由張樹聲奏保知縣八年在天津平朝鮮案內由張樹聲會同李鴻章奏保以直隸州補用十五年以鄭州決河合龍由倪文蔚奏保以知府補用加三品銜此該員游歷職官之大略也該員少有志節更歷兵亂年未三十卽棄舉子業專致力於經世有用之學推本經術旁通史要於歷代理亂得失之故東西各國政教異同之理一一究心發爲文章通達淵雅而尤長於章奏故張樹聲巡撫江蘇時訪知其賢

以禮延致幕中前後十餘年海內賢樹聲者無不賢該  
員光緒十年樹聲上疏論薦亦謂服官南北一切吏治  
軍謀理財柔遠諸大政幸而不至隕越者實何嗣焜之  
力居多也樹聲旣卒該員回籍李鴻章劉秉璋先後延  
致未就十二年劉銘傳奏調奉

旨迅速赴台以事未行十三年河決鄭州河南巡撫倪  
文蔚奏調赴工差遣奉

特旨發往該員與倪文蔚相知雅素旣至則以籌畫工  
料諸事竭知盡能如佐張樹聲時十五年工振事竣卽  
稟請奏明回籍自是而後退居武進西鄉時時周歷隴

畝與農夫野老相雜作有終焉之志各省疆臣大吏如  
奎俊裕祿張之洞鹿傳霖劉樹堂額勒精額咸致書問  
通懇勸思招而致之而該員澹於榮進悉謝不往此該  
員生平學行之大略也方臣宣懷議設南洋公學之初  
私以爲國家以人才爲本人才以學堂爲基而非先教  
師範無以爲異時各學校之矩非先慎教法無以爲目  
前師範生之繩然各處學堂大概措意於西文西語者  
多而於中國古聖賢政教之方或轉在不暇講求之列  
根柢不厚流失必多博求總理之人非該員不足當此  
選臣宣懷本與該員同里乃親詣其廬申論此意且責



以時局艱危不當徒爲潔身之士該員慨然褰裳相就  
既至先爲經營公學房屋規模闕敝度支詳覈首開師  
範院次立外院中院上院招年少聰穎有志之士爲外  
院生卽以師範生教之外院生以二年卒業推升中院  
中院四年遞升上院學則中西兼課其教中學也略師  
宋儒經義治事之法以六經爲體以歷代政書如通典  
通攷通禮爲用分門研究務當實用不爲高遠之論而  
尤日以持身行己之道兢兢與諸生相勗勉其教西學  
也始於西文西語以漸及於各國法律政治之精沿流  
溯源務究其旨其堂規整齊畫一以起居食息致其愛

護子弟之心以藏脩息游示其張弛精神之節務俾諸生受範而不苦知方而易從以漸合乎古聖賢小學教民之遺意四年以來成效漸著先後遣送學生游學日本英美各國臣等體以人事君之義存拔十得五之思方冀過茲以往公學教育益臻美備或當有人焉供濟時之効而豈意與創其事者并不能待此庶幾之一日卽尋繹其臨歿所屬之稿參校古今稽合中外大指雖可懸揣而知然觀其按而不斷之詞實多引而未伸之意臣等又痛該員所謂今日變法非以維新實以復舊者不克終竟其志以觀

朝廷治化之成也今各行省及各府州縣皆須舉辦學堂立教之法與授教之人純駁精粗皆關當世士習人才之命脈如該員何嗣焜者學行允孚體用明白正可舉爲總辦學堂者勸查光緒五年大學士左宗棠爲已故軍務人員夏忻王柏心吳士邁吳觀禮四員志節可傳

奏請宣付史館奉

旨允准在案何嗣焜學行出處與夏忻王柏心吳士邁吳觀禮等大略相同用敢援例合詞恭懇

天恩飭將已故三品銜補用知府何嗣焜生平事蹟宣

付史館立傳臣等無任感激屏營之至所有何嗣焜臨  
歿遺稿除鈔錄咨送政務處外謹據實具

奏伏乞

皇太后

皇上聖鑒訓示謹

奏 十一月 日奉

硃批著照所請該衙門知道欽此

蹕路電線工竣援案請獎摺

光緒二十七年十一月

奏爲遵造

蹕路電線全工告竣謹將出力各員援案擇尤懇

恩獎勵以資感奮恭摺仰祈

聖鑒事

臣

前奏籌款展造潼關經陝州河南府至孟

津渡黃過懷慶衛輝彰德入直境由順德廣平正定三  
府以達保定又從河南府另造一線以達開封光緒二  
十七年五月奉

硃批著照所請該部知道欽此

臣

當卽遴派熟悉工程

員董學生或集款項或購材料或長途轉運或晝夜鳩

工不數月間全工告竣已據總辦豫直電工四品銜候選知州沈兆棟等次第稟報前來查此路並無合用電杆委員採辦價貴物希幸未貽誤又值夏令發水之時運料栽杆該員生等均能不避艱險勤督工作歲事既速節費較多查電線工程迭經北洋大臣李鴻章奏准按照異常勞績保獎前次雲南接展騰越剝隘線路兩廣接展南甯等處線路經前任雲貴督臣王文韶兩廣督臣張之洞請保各三四十員分別異常尋常給獎此次直豫電工係爲

乘輿必經之地應通緊急

詔令章奏而設所關尤屬重大臣飭查在事計有四十餘人逐加核刪擬保十四人應請仍照上屆成案擇其尤爲出力者八員按照異常勞績保獎其出力稍次者六員仍照尋常勞績擬獎以示區別謹開繕清單仰懇天恩俯念

行在電報事關機要

特旨允准照獎俾資鼓勵出自

逾格鴻慈除將各員履歷造冊咨部外所有展設

蹕路電線竣工接案擇尤請獎緣由恭摺具陳伏乞

皇太后

皇上聖鑒訓示謹

奏 本月十二日奉

硃批著照所請該部知道單併發欽此



謹將展造陝西河南直隸三省

踴路電線出力各員分別異常尋常勞績保獎開具清單恭呈

御覽

計開

四品銜候選知州沈兆棟請以知府儘先選用並加三品銜四品銜指分江西候補直隸州知州王庭珠請以知府仍留原省補用候選知縣周萬鵬請以同知不論雙單月選用知縣用候選縣丞龐鍾璘請以知縣不論雙單月選用分省試用縣丞孫寶琛金蔭康馮啟程李

松年均請以知縣仍分省補用

以上八員係辦理三省電線實屬異常出力應照異常勞績擬獎

候選郎中李維格請加三品銜候選同知李銘祥請俟得缺後以知府儘先選用候選知縣鄧嘉纘楊光斌請俟得缺後以直隸州知州儘先選用同知銜指分湖北候補知縣姚訓才請俟得缺後以同知直隸州仍留原省補用並加四品銜候選縣丞孫永金請俟得缺後以知縣用

以上六員係辦理三省電線出力稍次應照尋常勞績

擬獎

皇朝通志

卷六 奏疏六

七 思補樓藏版

請保孫寶琦王國楨片

光緒二十七年十一月

再此次展造潼關以達豫直電線臣在上海相隔太遠  
深恐呼應不靈

奏明派西安官電局員總辦直隸候補道孫寶琦王國  
楨督飭催辦就近調度以速要工而免隔闕該道等自  
奏派後與辦工轉運各員妥籌造作以及分段設立局  
所選備工丁巡修又於

輦路尖宿緊要之處皆預備接線安機以通要報均能  
布置裕如大抵電線所在最慮兩弊一曰延滯二曰漏  
洩臣督辦二十餘年無日不兢兢於茲以防積久弊生

計自

兩宮蒙塵以來

行在詔書全權章奏雖一紙一字動關緩急安危之計  
臣尤無不晝夜防維慄慄危懼然若非

行在官電報局員謹慎小心臣之心力亦何能遠馭及

之該道等係監司大員不敢仰邀獎敘惟電報爲臣所

專司亦未便沒其勞勩應否酌量獎敘以示鼓勵出自

天恩理合附片具陳伏乞

聖鑒謹

奏 本月十二日奉

旨留中欽此

請卹張毓樹片

光緒二十七年十一月

再同知銜直隸候補知縣張毓樹前辦保定電報局經  
拳匪進城堅守電局受有重傷卽回上海就醫痊愈適  
值恭辦

踴路電料緊要遴委該員由陸路運解前往因恐延誤  
要工星夜兼程前進旣抵河南府工次將料物點交後  
復委令管解木價銀兩馳赴直隸順德府交收中途遇  
水遇雨感受暑溼積勞致疾舊傷復發於五月初七日  
在河南懷慶府孟縣途次身故准河南撫臣松壽轉據  
署孟縣知縣胡嗣芬稟報轉咨前來臣查光緒十二年

川滇展設電線案內轉運委員直隸候補知府舒之翼  
等中途染瘴身故經前大學士直隸督臣李鴻章附片  
奏請

賜卹在案今該故令張毓樹兼程運料在途致疾舊傷  
復發猝爾身故事同一律合無仰懇

天恩俯准飭部照軍營積勞病故例從優議卹以慰幽  
魂而昭激勸謹援案附片具陳伏乞

聖鑒謹

奏 本月十二日奉

硃批著照所請該部知道欽此



賞加太子少保謝

恩摺

光緒二十七年十一月

奏爲恭謝

天恩仰祈

聖鑒事竊

臣

接閱電傳邸鈔光緒二十七年十一月初

一日內閣奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨  
宗人府府丞盛宣懷贊襄和議保護東南地方著賞加  
太子少保銜以示獎勵欽此聞

命自天感悚伏地當卽恭設香案望

聖齋存橐

卷六

奏疏六

三

思補樓藏版

闕叩頭伏念臣猥以輅材忝當劇任當去歲擾攘兵戈之際是臣子捐糜頂踵之時列強政策則緯繡以難連中外人情劇蒼黃而狼顧機爭頃刻局繫安危輒忘才術之愚疏勉冀韓回於萬一上承政地旁協疆臣保敦槃以靖兵戎藉忠信而爲干櫓天心悔禍

### 皇業重安繫

朝廷陽開陰闔之微權復海內遠至邇安之盛軌願臣謫劣何與功能沐

寵命之便蕃荷

溫綸之褒錫拜

恩兢惕撫己回徨以三品而兼三少自前代爲美談無殊能而冒殊榮愧

聖慈之曲被臣惟有勉勤職守益矢冰淵劑商稅之盈虛審川塗之閑塞

天行星陣未得隨

芝蓋以奔趨

日就雲瞻尙自厪葵心之傾向所有微臣感激下忱理

合恭摺具陳伏乞

皇太后

皇上聖鑒謹

愚齋存彙

卷六

奏疏六

七

補樓藏版

奏 十二月初一日奉

硃批知道了欽此

南洋公學推廣編輯政書摺

光緒二十七年十二月

奏爲南洋公學推廣編輯政治法律諸書敬陳綱要大  
端恭摺仰祈

聖鑒事竊

臣

於本年六月十四日奏陳南洋公學推廣

編輯事宜一摺七月十二日奉

硃批卽著推廣編輯欽此欽遵在案

命下以來諏訪通材博求善本數月之間略知端緒蓋  
近口東西人士觀光中夏者靡不以興學爲自強之急  
圖而譯書尤爲興學之基址專門之書與普通之書異  
小學校中學校之書與大學校書異私家著述教門傳

是亦不學  
卷六  
習之書與文部所定學校所用之書又異且各國風尚  
不同習其學者莫不自尊其說擇焉不察流弊滋多故  
論譯書則天算製造較政治史學爲難論選書則政治  
史學較天算製造爲難昔年官譯諸書祇有同文館所  
譯法國律例製造局所譯佐治芻言數小種餘皆不及  
政治蓋不敢率爾操觚其難其慎良有故矣現在舉行  
新政凡學校科舉軍政財政諸大端欽奉

明詔一皆參酌中西以議施行則凡有關於乎學校科舉  
理財練兵之政治法律諸書均待取資勢不容以再緩  
臣所辦公學譯院經費無多規模誠未能盡量擴充辦

法則不敢不悉心斟酌敬陳綱要凡有四端其一曰先  
章程而後議論自昔臣工條奏闕於辦法往往難見施  
行江鄂會奏所謂攷求西政者不過粗知大略不能詳  
舉其章誠學者之通病其故由政令無可攷之書而議  
論之傳自教會報章者斷爛不完且不免郢書燕說莠  
言篤論糅雜難分無所據以正之競騰口說嚮凌彌甚  
臣痛心茲事歷有歲年現擬先譯日本法規以啟其端  
其書皆取則於泰西一年一修皆彼所身體力行損益  
去取而後定倘中國再能隨時損益去取積以歲時可  
期詳備其二曰審流別而定宗旨泰西政俗流別不同

有君主專制之政治有君主憲法之政治有民權共和之政治有民權專制之政治美民主而共和法民主而專制其法律議論判然與中夏殊風英之憲法略近尊嚴顧國體亦與我不同惟德意志自畢士馬以來尊崇帝國裁損民權畫然有整齊嚴肅之風日本法之以成明治二十年以後之政績俄雖號君主專制之國其法律多效自法人制度與國體參差故邦本杌隉而世有內亂不若日德之鞏固也較量國體惟日德與我相同亦惟日德之法於我適宜而可用臣嘗謂欲求詳備必博選通達古今之士游歷德國逐事諮詢仍於各省多



設德文學堂廣譯德書而後斟酌損益可以萬全而無  
弊今茲公學力有未能姑就東文之繙自德文者譯之  
得尺得寸爲早年一概之計他年經費可籌尙思授德  
文而傳德學格致製造則取法於英美政治法律則取  
法於日德悽悽微忱實在於此惟

聖明鑒察而指示之其三曰正文字以一耳目自古爲  
政必正名周禮行人諭書名外史達書名鄭氏皆釋以  
文字王天下有三重同文而後得同倫此我

世宗憲皇帝所以定同文韻統以治黃教

高宗純皇帝所以脩西域同文志以靖四部者也課學

必以譯本譯本要在同文昔時譯署繙書人地國名皆取準於瀛寰志略與官文書一例視而可識鞞寄無歧後來化學書亦有定名便於讀者良非淺尠而近來私譯名字紛拏官譯爲其所淆亦復不能自守西班牙國有數譯維多威廉人有數名讀者方審音測字之不遑何暇研究事理印度以語言雜而致紛爭埃及以文字雜而致危殆中國語言文字幸爲薄海同風無故自亂其例橫生障礙何爲乎臣今所譯科學書夥多不敢不致慎於斯除隨文勘整外其人地國名品彙名物仿古人一切經音義繙譯名義集之例別爲名義增諸卷

後尙思取西文字典分類譯之以期諸學淺深綱要開  
卷瞭然專門者藉以溯洄涉獵者亦可預知門徑其四  
曰選課本以便教育中學博而寡要在於成人以後不  
在蒙養之初其不適當世之用者由於科學之課程不  
具非由經籍之義理太深也教西學者於格化識其精  
蘊於政法觀其會通其得力在象勺之年至於髫髻之  
初苟無小學孝經四書預固其根基成人以後放僻邪  
侈流極不知何底近日學堂新論不知謀學課於成人  
之後而務鑿童真於蒙養之初拾西士之唾餘謂中國  
文法太深謂四書朱注無用俚文俗語造作短書於西

學未有入門發軔之功而於中學已啟拔本塞源之弊  
羣盲相引實賊聽聞臣今所譯爲學堂計以外國尋常  
小學校高等小學校課本備將來各省小學堂之用以  
外國尋常中學校高等中學校課本備將來各省中學  
校之用專取其文部所定教員所授之本咫聞雜學概  
不兼收以西學佐子史之旁通不敢以俗說代經文之  
正本學生在學自十二歲至於二十五歲日月方長但  
令西學課本條理秩然儘足備當世之取材亦不憂無  
暇日以畢經書之業不必遽求速化轉滋流弊也凡茲  
諸事在外國皆文部所裁定他時京師大學堂自當有

頒行規則臣拮据措辦局在海墘就現有經費爲一家體例思慮所及粗立體裁亦不敢自謂所見之不差尙望

聖明飭下政務處及京師大學堂速立學堂課本章程早日通行俾海內有所準則以免紛紜駁雜之病埃及學校四千學生二十萬廢國文而借英法德文爲課程比有事曾不得一人之用英德諸國學業之興並由譯拉丁書爲本國文字而後羅馬諸學之精微學者得以用力少程功多名家輩出超軼前代然則變法之端在興學興學之要在譯書舉天下學者而變之其中反復

推遷十年中尙不知有幾何變態東西各國成事炳然  
要之發慮造端宜規久遠決不可誤於流俗淺躁急切  
之言圖大於其細慎終於其始風俗人心關繫在此所  
有南洋公學推廣編輯政書敬備陳綱要大端情形謹  
恭摺具

奏伏乞

皇太后

皇上聖鑒訓示謹

奏 本月二十七日奉

硃批著政務處大學堂覈議欽此

請設商務學堂片

光緒二十七年十二月

再臣自奉會辦商務大臣之

命卽奏明俟款議大定必須廣商學以植其材聯商會以通其氣定專律以維商市方能特開曹部以振起商戰足國足民已故大學士李鴻章前派商務大臣時與臣論及亦以是爲富強之本並謂吾年已老勉臣後來臣今臣奉

旨派爲辦理工商稅事務大臣與各國專使會議修改商約重訂稅則此中得失利弊關係久遠之計各國使臣不特恃其國勢強詞奪理併係商學出身細鍼密縷每

議一事無不曲折詳盡臣三十年來在通商口岸隨同李鴻章辦理洋務商務僅稍知其事理所當然而於泰西商學商律何能識其款要惟有勉竭愚誠力圖補救並遵

旨就近會商督臣劉坤一張之洞並與外務部函電籌商以決可否而赴事機查英國所議條款內有請於上海開設行船律例及審斷商務衙門一條據該使言此為中國代籌方能獲通商之益臣以為定商律設商務衙門將來應由政務處會同外務部

奏請核定惟開設商務學堂繙譯商律全書為將來定



律設部根本是臣之責斷難再事緩延臣已派洋教習  
赴各國考察商務學堂規範並由出使大臣楊儒羅豐  
祿伍廷芳等購覓商律各書籍先後寄到擬於南洋公  
學之旁購地建造商務學堂一所並飭譯書院加延華  
洋譯士將商務有用之書加緊繙譯定以程限事在必  
成惟是南洋公學今春選派頭班學生出洋肄業又新  
添東文學堂繙譯東文書籍資斧已無所出現須添辦  
商務非籌可靠常年之費徒成虛願必無實際臣所司  
鐵路鐵廠均值創造艱難尙難籌款輪電兩局去年因  
拳匪之亂俱增虧累且經奏定每年報効二成之外免

長不... 卷二  
再派捐實未便再事苛求致令華商退沮值此帑項萬  
難之際臣又何敢另請

國家籌款思維再四輪電兩局報効二成之內有撥助  
天津學堂經費輪船二萬兩電報二萬元去年該學堂  
爲德兵所踞學生皆被難南來臣爲設法收集並將頭  
班卒業學生選派出洋肄業此後各省學堂已於八月  
初二日欽奉

上諭著各省所有書院於省城改設大學堂各府廳直  
隸州均設中學堂各州縣均設小學堂著各該督撫學  
政切實通籌認真興辦等因欽此在案是直隸學堂無

論改設保定或天津應由該省通籌辦理所有輪電兩局報効銀二萬兩洋二萬元無論如何爲難擬仍令該局輸捐撥歸上海商務學堂及東文學堂繙譯商律各書之用其已派出洋肄業之北洋學生歲需經費約一萬餘兩暫在此款內勻撥開支如有不敷由臣隨時設法籌湊夫以商人報効之資爲振興商務之用於理至順况商學商律實爲

國家當務之急他年富強之基部省不費籌資而

朝廷坐收成效如蒙

俞允

臣

當督率所司迅速認真開辦並將該學堂及譯

書院出入帳目按年核實

奏咨以備考核謹附片陳請伏乞

聖鑒訓示謹

奏 本月二十七日奉

硃批知道了欽此

朱李氏捐振請准建坊片

光緒二十七年十二月

再上年欽奉

諭旨籌辦義振業經墊款解赴秦晉分別查放茲有浙江錢塘縣籍已故兵部右侍郎朱智之繼妻二品命婦李氏因念秦晉振務急需願將積年衣飾變價充振計庫平銀壹千兩遣孫員外郎銜朱應鵬呈解前來臣查朱李氏節儉持家素稱賢淑聞西北荒旱之後民困未蘇慨然罄其所存捐助振款洵屬深明大義核與建坊之例相符理合援案奏請

恩准二品命婦朱李氏在原籍自行建坊給予樂善好

施字樣以昭激勸除兌收彙解外謹附片具陳伏乞

聖鑒謹

奏 本月二十七日奉

硃批著照所請禮部知道欽此

補授工部左侍郎謝

恩摺

光緒二十八年正月

奏爲叩謝

天恩恭摺仰祈

聖鑒事竊

臣

接閱邸鈔光緒二十八年正月十三日內

閣奉

上諭工部左侍郎著盛宣懷補授欽此聞

命自天感悚伏地當卽恭設香案望

闕叩頭伏念

臣

謬以菲材疊邀

殊遇典司宗祏旣舉職之未能酌劑權緝更利源之待

濬茲復渥承

恩命游貳冬曹竊念周官本重考工唐制獨崇左轄所以材資飭庀貨貴阜通商政之與工官消息相爲表裏自維譴陋深懼弗勝臣惟有益勵精勤勉循職守遵同軌以通道路塞漏卮而挽利權擬效史官平準之書上裨

聖世脩和之治庶殫智慮稍竭涓埃以期仰答

高厚鴻慈於萬一所有

微臣

感激下忱理合恭摺具陳

伏乞

皇太后

皇上聖鑒謹



奏 二月 日奉

硃批知道了欽此

盧保鐵路工竣先將官款造銷摺

後銜

光緒二十八年二月  
直督袁鄂督張會

奏為鐵路總公司建造盧保鐵路工竣先將收支官款  
撥案造冊報銷並繕清單恭摺具陳仰祈

聖鑒事竊臣辦理盧漢鐵路就上海設立總公司

奏准撥發官款以為全路基礎津漢兩端各設分局專  
理工程歷將辦法大概情形

奏明在案伏念京盧至漢口幹路跨越三省體大物博  
非籌借洋款無以竟工非酌撥官款無以固本臣受

命之始借款未成先與英工程司訂造盧保一段計正

路二百三十四里四成五分按照雙軌購地填土爲將來開拓張本目前先安單軌另築周口店運石枝路計長二十七里六成連同榦枝路內輪車往來相避岔道接長四十四里五成三分共計軌長三百六里五成八分歐西路工繁簡以沿途橋梁大小多寡爲斷直境爲九河故道渾河琉璃巨馬北河等處有寬至一千六百餘尺此外細流巨浸均關

畿輔水利不容稍有防遏計盧保一段榦枝兩路共修鋼橋九十一座接長至一萬一百十有七尺京津各橋工無此艱鉅此外車站道房機廠料廠及一應大小西

式房屋並轉盤水櫃電線等工應有盡有不能稍從簡  
畧所辦外洋材料皆照工程司細帳開標定價擇廉訂  
購各洋商領價洋單隨時簽字作據各段匠夫工價並  
內地購辦料物悉令檢同洋單隨冊併送津局核支按  
月轉報總公司派員覆核開辦伊始道遠運艱應用洋  
料從寬購備核計盧保工竣所存各項料物照原價約  
估尙值銀五十餘萬兩悉歸北路接展保正路工等用  
鐵路爲中國創辦之舉向無例案可循前督辦關內外  
鐵路臣胡燏棻奏銷盧榆兩路報銷經兵工二部  
奏奉

諭旨歸併總理各國事務衙門會同總辦鐵路礦務大臣核實辦理欽此欽遵在案盧保報銷事同一律據委辦上海總公司購料處候選道朱寶奎委辦天津工程轉運局直隸候補道張振榮等督同總公司造冊委員核造盧保鐵路四柱收支總細各冊開具簡明清單詳請奏咨核銷前來臣詳加覆核其收款項下總公司承領南北洋官款英德借款昭信股票官款共計四次實領折合庫平銀九百三十五萬六百四十八兩有奇又盧保路成開車日起截至光緒二十六年八月贖成比員經理日止所進車腳制錢折合庫平銀十二萬七十

五兩有奇二共實收庫平銀九百四十七萬七百二十  
三兩四錢一分一釐七毫開除項下盧保造路造車地  
價工料以及鐵路學堂補修養路共計四項實支庫平  
銀五百四十二萬六千五百七十兩三錢六釐又另冊  
請銷總公司華洋員司薪費履勘盧漢全路經費南端  
漢澠官辦料件共計三項實支庫平銀十九萬五千四  
十兩一錢七分八毫統計動支經費庫平銀五百六十  
二萬一千六百十兩四錢七分六釐八毫餘存官款接  
續核支並另案

奏辦淞滬鐵路及預支漢廠軌價維持鐵政以塞漏卮

自容接續造銷各清各款除清冊咨部外謹援案繕具  
清單恭呈

御覽仰懇

天恩飭下外務部戶部暨路礦總局查核准銷所有總  
公司建造盧保鐵路工竣先行造銷緣由理合會同署  
直隸總督臣袁世凱湖廣總督臣張之洞合詞恭摺具

陳伏乞

皇太后

皇上聖鑒訓示謹

奏 三月初五日奉

硃批該部覈議具奏單併發欽此



謹將鐵路總公司建造盧保鐵路工竣收支官款總數  
並附銷各項經費繕列簡明清單恭呈

御覽

計開

收款項下

一第一次承領南北洋等官款規銀三百萬兩計折合  
庫平銀二百七十五萬五千二百五十六兩一錢二分  
七釐八毫

一第二次承領英德借款等官款規銀四百萬兩計折  
合庫平銀三百六十四萬九千六百三十五兩三分六

釐五毫

一第三次承領昭信股票官款銀三百萬兩除各省短  
解外所有各省解到銀二百十五萬三千五百八十六  
兩三錢五分四毫平色不一共計折合庫平銀二百十  
四萬三百二十兩二錢六分五釐一毫

一第四次承領德華洋行提回續借英德金鎊官款共  
合規銀八十八萬二千七百五十八兩六錢二分計折  
合庫平銀八十萬五千四百三十六兩六錢九分七釐  
一毫

以上四項共收庫平銀九百三十五萬六百四十八兩

一錢二分六釐五毫

一盧保鐵路客貨各票車價制錢折合庫平銀十二萬七十五兩二錢八分五釐二毫

以上一項共收庫平銀十二萬七十五兩二錢八分五釐二毫

統計共收庫平銀九百四十七萬七百二十三兩四錢一分一釐七毫

開除項下

一盧保鐵路造路經費七十八款計支庫平銀四百三十六萬三千四百八十六兩六錢一分一釐五毫

一盧保鐵路造車經費三款計支庫平銀七十三萬六千四百六兩五錢八分一釐四毫

一天津鐵路學堂經費二款計支庫平銀二萬六千二百七十八兩五錢九分一釐四毫

一盧保鐵路補修養路經費三十一款計支庫平銀三十萬三百九十八兩五錢二分一釐七毫

以上盧保鐵路各款共支庫平銀五百四十二萬六千五百七十兩三錢六釐

一附銷鐵路總公司經費四款計支庫平銀九萬九千四百四十二兩七錢五分六釐六毫

一附銷盧漢勘路經費一款計支庫平銀一萬七千四百二十一兩九錢三分九釐八毫

一附銷漢澠購料經費一款計支庫平銀七萬八千一百七十五兩四錢七分四釐四毫

以上附銷鐵路總公司等款共支庫平銀十九萬五千四十兩一錢七分八毫

統計盧保鐵路及附銷鐵路總公司等項共支庫平銀五百六十二萬一千六百十兩四錢七分六釐八毫

實在項下

一應存庫平銀三百八十四萬九千一百十二兩九錢

愚齋存彙

卷六

奏疏六

三

思補樓藏版

三分四釐九毫接續撥支另案造銷合併聲明

請減輕茶稅摺

光緒二十八年三月 商約大臣呂會

奏爲茶稅過重銷數日少籲懇減輕以紓商困而維大局據實瀝陳恭摺仰祈

聖鑒事竊自中外互市以來中國銀錢流出外洋不少惟賴出口土貨藉以稍補漏卮土貨之中向推絲茶爲大宗而茶葉則分紅綠兩種紅茶在湖北之漢口行銷綠茶在江蘇之上海出售從前外洋不諳種茶之法各國非向中國購食不可彼時茶值甚昂不論貨之高低牽勻計算每担可售五六十兩至七八十兩不等是以茶葉稅則亦不分別貨色定爲每担抽稅二兩五錢按

值百抽五之例原屬相符迨印度錫蘭出產紅茶日本出產綠茶以後悉用機器製造價本既輕印度日本又免徵稅銀錫蘭不特免徵每磅并津貼銀三分五釐約合每担津貼銀四兩之多力使暢銷推廣中國產茶業戶則蹈常襲故於種植焙製各法未肯講求商人因銷路日疲或相率作偽貶價求售茶盤遂至逐年遞減漸成江河日下之勢臣宣懷前奉會辦商務大臣之

命卽准原任大學士李鴻章咨據駐滬考察商務委員洪翼昌稟報茶業一項年年減數請認真整頓設法挽回並探聞印度茶葉由雲南浸入內地者不下一萬餘



担若緬甸鐵路一成來源既易非但中國出口茶葉漸少恐中國銷用印度之茶反年暢一年惟有減稅輕本免絕生機正在核辦間適奉

旨議辦商稅事宜接准英使馬凱開送商約大綱二十四款內第九款卽以減輕茶稅爲請並據在滬茶商董事梁榮翰等聯名呈稱咸豐同治年間所售紅綠茶價甚高每担定出口稅銀二兩五錢商力尙可支持近來銷滯價跌紅茶最高者爲祁門甯州綠茶最高者爲婺源平水每担售價不過四五十兩其次之各種低茶售不及二十兩加以內地所完落地稅釐金等項幾於十

取其二際此重修稅則懇請體恤商艱當經飭令隨辦商約之稅務司裴式楷賀璧理戴樂爾查明核議去後茲據該稅司等先後查得該商董所呈均係實情並以中國運英茶葉同治十年尙有一萬三千九百萬磅錫蘭茶僅一千五百萬磅至上年中國茶祇有一千八百萬磅錫蘭茶則增爲二萬六千四百萬磅又中國運俄茶葉光緒二十四年尙有五千萬磅錫蘭茶僅一百五十萬磅至上年中國茶祇有三千一百五十萬磅錫蘭茶則增爲一千萬磅卽以中國近三年出口茶數而論光緒二十五年尙有一百一十四萬九千餘担二十六

年祇有一百六萬三千餘担二十七年則僅有八十五萬四千餘担比例參觀是洋茶日盛華茶日減恐四五年後無人過問亟應設法補救等情具復前來臣等公同商酌再四籌維國計民生均關重要當茲時局艱難賠款無出尙何敢輕言減稅祇以目擊茶銷壅滯商力困疲若再不亟圖維持微獨華茶不能行銷於外洋轉恐洋茶得以充斥於中土與其將來稅釐全失計莫如漸爲減稅使成本稍輕銷場漸旺數年之內出口茶必加多其稅自可抵減徵之數尙期收效桑榆誠屬兩益辦法臣等本擬待商約定後再行請減惟洋茶銳意攘

奪華茶年少一年愈遲愈難補救現值茶葉將次上市若再不因時量減坐使銷數日短稅於何有徒令茶業商民俱失生計無可挽回此實關係商務至大至急臣等職司商稅何敢默然相應懇

聖明飭下部臣轉飭總稅務司卽將出口茶稅改爲按照時價值百抽五於定章並無違礙庶幾

恩出自上商困得以稍紓商情必形鼓舞目前暫少茶稅容臣等與稅務司設法於別項出口貨稅酌量加增藉以抵補並請

飭下湖北湖南江西安徽浙江福建產茶各省於茶葉

一項減稅之後不可再行加釐俾免滯銷而維大局所  
有瀝陳減輕茶稅以紓商困緣由是否有當伏乞

皇太后

皇上聖鑒訓示謹

奏 本月十六日奉

硃批該部妥速議奏欽此

愚齋存彙

卷六

三

愚齋存彙卷第六

愚齋存彙卷第七目錄

奏疏七

遵 旨密籌加稅免釐事宜摺

密陳釐金收入及核算加稅實數片

酌擬稅釐併徵加稅清單並附

遵 旨妥議粵漢鐵路辦法並鈔呈美國借款合同摺

估修稅則完竣摺

請建上海李鴻章專祠摺

遵 旨另訂正太鐵路借款合同摺

核減招商局承運漕糧水腳摺

愚齋存稿

卷七

見不刊

請設上海商業會議公所摺

淞滬鐵路工竣造銷摺 工程收支清單並附



愚齋存稟卷第七

奏疏七

遵 旨密籌加稅免釐事宜摺

光緒二十八年五月  
商約大臣呂會奏

奏爲通籌加稅免釐遵

旨悉心核議恭摺密陳仰祈

聖鑒事竊

臣

等於本年四月初九日接准外務部電傳

奉

旨商約一事財政攸關最爲緊要前以盛宣懷熟悉商情特旨派令議辦此事並飭隨時與劉坤一張之洞悉心商酌嗣後添派呂海寰會同議辦乃數月以來尙無

頭緒迭經外務部將歷次往返電函呈覽所議加稅免釐一節現在償款日急財力奇窘亟應通籌出入力保利權不可稍涉大意致滋流弊著責成呂海寰盛宣懷務當激發天良扼要辯論切實磋磨詳慎核議仍遵前旨與劉坤一張之洞會商妥爲籌定期於財政無所虧損有裨大局毋負委任欽此仰蒙

訓誨周詳曷勝感悚伏查上年十二月英使馬凱開送商約大綱之初臣宣懷詳加審酌卽以加稅免釐爲全約主腦關係

國計民生至爲重要卽經迭次電商外務部戶部及兩

江督臣劉坤一湖廣督臣張之洞請先預籌一定辦法以備操縱及馬凱開議先將擠我釐金各款詳目交出催偪商訂而不提加稅當時卽已窺破其隱意在使彼進出口貨不受抽釐之害卽可勿議免釐更毋庸許我加稅是以一面堅持擯不與議惟議無關稅釐各款以爲宕延之計專候各處電復冀得定盤鍼免致趨向有所歧誤旋接外務部養電謂認定款項收數有盈無絀商民有利無害便是扼要辦法倘有可乘之機自應趕緊下手時不可失又接會同戶部敬電謂彼不加稅而先擠免釐驟失巨款其何能支若議稅釐併征必須統

籌細核約計收數能較向來所入確可有增無減方好  
議辦江督來電謂此次議約聞外人注意在路礦免釐  
等事而釐捐尤爲深惡必照議裁而後加稅照商會所  
議可加至值百抽十或多至十二五若欲仍留內地之  
釐非但洋稅難加且必如鄂督言不明免亦必盡歸洋  
旂多方箝制隱爲阻撓雖有如無轉受大虧不如加稅  
免釐從此交涉可省無數葛藤明知加二十必不能允  
卽加至十五仍得不償失不能不將土貨出口之稅酌  
加若出洋大宗絲茶不但不宜加且必須計值核減統  
盤籌計當無所損中國年來百物昂貴貧民食用維艱

每爲釐金重累釐若全免物價必平不獨食力之民易於溫飽工料之價亦必減廉出口之貨必可漸旺又歌電謂彼於釐務著勁相擠我縱竭力防範釐虧無補財用必絀又漾電謂與其釐捐處處爲彼侵削牽制暗受大虧不如免釐加稅以輕土貨價值得以暢銷路紓民困之爲愈第征免總須抵補有餘方是勝著鄂督藥電謂稅章通行則土貨皆歸聯單免釐定界則蘇滬粵漢津皖等處凡各省最大之釐局皆附近租界者均不能抽中國釐金不言免而自免矣此時總以先議加稅爲主彼稅多加則釐多免稅少加則少免務以足數相抵

爲度萬勿與議零星釐章若零星允許抽釐之權全行奪去彼尙肯加稅乎若議定彼加稅我免釐則須另議辦法甚爲簡易現聞漢口洋商已聯稟馬使請將漢口漢陽武昌三處統歸入漢口口岸作爲免釐界限他口洋商情事亦必相同又宥電謂土貨爲外國侵銷者自宜免釐而不加稅除絲茶外詳查無論外國侵銷與否出口者總以不加爲是各等語是彼此意見均各相同

適臣海寰奉

命會辦迭與集議亦確見馬凱辯論重在擠我釐金遂定議向彼先索加稅馬凱所送第十及二十三款詳目

並無加稅實數而欲將一切釐捐雜稅概行裁免因向  
彼索加稅每值百抽二十以抵所免各項馬凱謂斷不  
能允嗣減至值百抽十五窺其意尙不十分爲難惟云  
總要行釐坐釐全除方可斟酌未幾而西商登報嘗議  
馬凱先允加稅之非美日各國亦不以加稅爲然英政  
府又電令馬凱須順商情爲主馬凱頗欲罷加稅之議  
一再商說然後允我自擬章程限期開送又復往返電  
商各處承准軍機處復稱加稅至十五尙不知果能抵  
免釐所失否賠款方急財力不支旣欲全免內地釐金  
斷非加至十五不可卽婉切磋商爲要戶部復稱免釐

加稅務須細核所加確數足抵免數方不喫虧竊計卽  
加至值百抽十五仍恐不足抵免釐之數惟華商久苦  
釐卡節節留難苛索若將過境行釐全免於產地銷場  
酌量加收統捐一次卽暢行無阻商情自必悅服收數  
亦不至大減似爲得計我旣恤商再議加稅必抵免數  
方可定議各等語臣等當卽參酌各處來電大意要以  
加稅之數足抵免釐之數爲主擬具辦法三端進口稅  
仍索十五出口稅估值抽足七五並留復進口稅產地  
銷場兩處分收旣難做到惟將行銷內地之土貨聽我  
自抽銷場稅比交馬凱卽謂十五之數奉國電不許再



議婉言相勸乃肯閱竟副總稅務司裴式楷調停擬加至十二五馬凱云內地釐金須予全撤仍留銷場稅亦難允行又切告以不敷抵我全釐不能不征銷場稅此係仿照各國征收煙酒辦法並與揭明加稅不允凡有礙釐金各款均不能議馬凱越日卽送來照會責我用延緩之術迫以免釐不議卽須接議各條臣等復往磋商馬凱詞色俱厲直不受我商量業將照會電陳外務部江鄂兩督查核市月以來馬凱非但不允所擬三端辦法還欲照天津條約第二十八款實力推廣務使各貨納子口稅後准由中國商人徧運天下給票爲毫不

另征之據咄咄相逼尤爲狠辣此臣等先後與馬凱籌議及電商各處之情形也竊思加稅罷議釐仍不免原無所失無如彼就舊約所載各條力求利益如暢行出口貨之三聯單整頓進口貨之子口單開闢通商口岸推展免釐界限駛行內河輪船等款卽江督歌電所謂萬不能一無所失鄂督軫電所謂釐名不去而釐權盡矣有百害而無一利則不如明免釐而索加稅尙爲合算且恐將來藉勢闖關越卡不就範圍添出無數交涉爲淵驅魚華商亦必爭相趨附希圖漏免則釐金受其攪擾更不可收拾彼時再欲加稅斷辦不到利權坐失

悔之已遲是以不敢放鬆加稅過與決裂總之一加一  
免必當通籌出入保我權利臣宣懷前年與英使所議  
專指進口洋貨加稅至十五出口土貨仍舊抽釐不過  
准將釐金收條抵完出口關稅此最上策惜乎中止今  
則時異勢殊我若不盡撤釐金彼斷不允以加稅此各  
國共有成見彼加稅若不能補釐所失我斷不允以撤  
釐此中國所當堅守惟照條約洋商販運洋貨土貨皆  
以半稅抵釐本不能再事重征所慮加稅之後我仍照  
前設法改換名目另征稅釐彼非至愚又詎肯空加每  
年二千萬之稅所以必欲擔保一如洋藥併征使彼心

目了然方能應允信則從疑則否全局關鍵在此一端  
但欲破洋商進出口貨留難需索之疑必須將沿途所  
設各項關卡盡行裁撤從此輪船則歸海關查驗完稅  
民船則歸常關查驗完稅內地自銷之土貨則歸各城  
鎮銷場處查驗完稅華洋商均歸一律毫無阻滯又欲  
破洋商出洋土貨影射重征之疑必須將不出洋之自  
銷土貨各種名色仿照海關訂定內地畫一稅則既可  
使洋人不疑從中弊混又可使局吏不能任意增減各  
國當無異言果能由我自辦銷場稅實較多加進口稅  
爲愈果能辦到值百抽十二五較原擬索加十五每貨

本一百兩僅少收二兩五錢歲計少收四百五十萬以  
現議另抽內地土貨之銷場稅相抵約計收數當不止  
是且銷場稅可備各省留用洋關進出口稅可歸戶部  
指撥將來再舉辦營業印花等稅可湊還不敷之洋債  
及籌辦自強新政之要需亡羊補牢於財政實多裨益  
此<sub>臣</sub>等通籌出入力保利權之辦法也處茲時局各國  
總以此次商約應予利益係和約第十一款所允許我  
不能不如所請彼眾我寡彼強我弱欲操勝算原無把  
握<sub>臣</sub>等受

恩深重日夜焦憤深恐才力不勝艱鉅惟有勉竭犬馬

愚誠外與各使磋商辯論內與外務部戶部江鄂兩督會商妥籌隨時電陳請

旨定奪除先行電奏外理合將通籌加稅免釐悉心核議緣由恭摺據實密陳是否有當伏乞

皇太后

皇上聖鑒訓示謹

奏 本月二十六日奉

硃批所陳具悉該大臣等務當通籌全局必使免釐加稅確足相抵方爲穩著仍著與劉坤一張之洞會商妥議詳晰具奏欽此

密陳釐金收入及核算加稅實數片

光緒二十八年五月  
商約大臣呂

會奏

再臣等與英使馬凱開議業經數月加稅一事見其屢  
屢變計實爲英商阻撓我若再事遲疑誠如戶部來電  
所言議久不決彼且多方要素奪我利權終必大受虧  
損然我之遲疑不能決者特恐所加不抵所免之數則  
財用愈不能支謹將向來所收之釐現在擬加之稅實  
在數目敬爲我

皇太后

皇上密陳之查前年

臣

宣懷在京時曾由戶部電詢各

省所收釐金內銷外銷實數經各省督撫電復綜計不  
及一千七百萬兩臣等與馬凱初議加稅時告以釐金  
解部之款有一千七百萬兩似釐非釐之款有三百萬  
兩各省自行留支之款有一千萬兩共三千萬兩皆須

（此處文字模糊，似有「臣等」等字）三千萬之數爲言



員均屬商務熟手尤爲狡獪臣等自揣愚闇原非所敵  
所恃者彼等於我內地釐金盈絀究未深知但惡其留  
難必欲除之以爲快故得以三千萬爲索補抵制之詞  
若真欲進口稅一項加至三千萬始允免釐其勢斷難  
辦到前飭據副總稅務司裴式楷姑按進口稅值百抽  
十二五出口稅值百抽七五並照舊抽收復進口稅核  
算總數所加約有二千三四百萬兩卽少亦有二千一  
二百萬兩似已足抵釐金報部及外銷實數况釐金一  
免民困大紓土貨暢銷漏卮漸塞銀價不致再跌鎊價  
不致再增而商民如釋重縛然後援照西法開辦印花

營業鋪戶等稅不致重累吾民蓋所獲無形之利益尤勝於有形之利益也至自銷土貨所擬改收銷場內地稅據釐局道員朱之榛密稱按蘇省釐金出洋土貨本屬無多仍以內地自銷爲大宗銷場稅如能辦成約計收數比較往日當不止於一半而又無礙於加稅實爲上策所慮馬凱能允加稅至十二五並允我自辦銷場稅但決不能允沿途另有關卡使其進出口貨仍患留難阻滯倘各省復有牽制竟辦不到又或各國別有要挾竟至中變均難預定近聞日本之意於加稅祇肯值百抽十於免釐則較英更爲狠毒英日交厚恐其先自

商定各國協以謀我誠不可不預爲防範臣等惟有竭  
心力之所能盡設法磋商以維

國計而紓

聖厯總之商約大端加稅辦成則全局俱勝不成則必  
處處喫虧馬凱以順商情爲主而商情變幻無定如不  
能悉照所擬辦法臣等斷不敢冒昧從事苟能有機可  
乘事之成敗決於旦夕臣等必當會商江鄂督臣劉坤  
一張之洞合詞懇請

宸衷定斷免致貽誤大局明知釐金相沿數十年各省  
賴此鉅款以爲補苴之計而官吏沾潤已久不暇念及

民瘼一旦革除難保不阻撓觀望謗怨叢集臣等將爲  
眾矢之的惟時局艱窘極矣民生凋敝亦極矣此舉能  
成與否實爲強弱轉移一關鍵何敢引嫌避怨坐失事  
機謹將前年戶部電詢各省所收釐金實數及此次副  
總稅務司裴武楷核算加稅數目分繕清單恭呈  
御覽又聞議約各使頗欲購覓各省實在釐金清帳是  
以臣等議辦此事甚防洩漏合併附片密陳伏乞  
聖鑒訓示謹

奏 本月二十六日奉

旨留中欽此

謹將副總稅務司表式楷酌擬稅釐併徵核算加稅數目繕具清單恭呈

御覽

一洋貨進口除照新約切實值百抽五正稅外擬加稅值百抽七五共計值百抽十二五

二土貨出洋除照舊約值百抽五正稅外擬加稅值百抽二五共計值百抽七五

三土貨由此通商口岸至彼通商口岸出口下轍時仍照第二款土貨出洋徵稅共計值百抽七五

四土貨由此通商口岸至彼通商口岸應於復進口時

再完值百抽二五之稅

以上辦法係將向來用運單之半稅及不用運單之釐金統共併徵在內

一每年洋貨進口共值貨本一萬八千萬兩除照舊收七百萬兩切實估足併連免稅貨將來約收九百萬兩外現擬增收值百抽七五之加稅每年約可增收銀一千三百五十萬兩

二每年土貨出洋共值貨本一萬七千萬兩除向收正稅五百三十萬兩外現擬切實估價收足值百抽五之正稅並收值百抽二五之加稅每年約可增收銀七百

四十五萬兩

三每年土貨由此通商口岸運至彼通商口岸共值貨本八千四百七十萬兩除照舊收三百八十萬兩外現擬切實估價收足值百抽五之正稅併收值百抽二五之加稅每年約可增收銀二百五十五萬二千五百兩四每年土貨由此通商口岸運至彼通商口岸共值貨本八千四百七十萬兩除照舊收一百七十六萬六千兩外現擬增收值百抽二五之復進口稅每年約可增收銀三十五萬一千五百兩

以上係按海關造冊處刊板貿易冊以前四年進出口

貨物價值均批估爲準則

一洋貨進口每年約計增收稅銀一千三百五十萬兩

二土貨出洋每年約計增收稅銀七百四十五萬兩

三土貨由此通商口岸運至彼通商口岸約計增收稅

銀二百五十五萬二千五百兩

四土貨復進口約計增收稅銀三十五萬一千五百兩

以上共計增收稅銀二千三百八十五萬四千兩又擬

民船與輪船一律完稅以防避重就輕常關增收民船

裝運洋貨應加徵七五土貨應加徵二五約計增收稅

銀一百萬兩又應除進出口向有半稅銀七十八萬五



千兩實計增收稅銀二千四百六萬九千兩

如將絲茶兩項值百僅止抽五以暢銷路則出洋土貨之內應除去茶葉二五加稅六十四萬九千兩絲綢二五加稅一百五十五萬兩實計增收稅銀二千一百八十七萬兩

謹將戶部電詢各省光緒二十三年分釐金收數繕具  
清單恭呈

御覽

盛京省

共收銀一十八萬二千餘兩

吉林省

共收銀四萬四千餘兩

收錢一十五萬八千餘串

黑龍江省

共收銀三萬餘兩

愚齋存彙

卷七

奏疏七

十四

愚齋存彙

直隸省

共收銀一十八萬四千餘兩

江蘇省

共收銀一百零四萬二千餘兩

收洋五十一萬一千餘元

收錢二百二十四萬八千餘串

安徽省

共收銀二十八萬四千餘兩

收錢三十萬零四千餘串

山東省

共收銀一十二萬四千餘兩

山西省

共收銀二十九萬五千餘兩

河南省

共收銀一十八萬三千餘兩

陝西省

共收銀六十五萬二千餘兩

甘肅省

共收銀二十六萬二千餘兩

新疆省

共收銀二千餘兩

福建省

共收銀九十九萬九千餘兩

浙江省

共收銀一百零一萬六千餘兩

收洋一百三十七萬四千餘元

收錢三十五萬餘串

江西省

共收銀一百二十二萬九千餘兩

湖北省

共收錢二百零七萬餘串

湖南省

共收銀八十八萬二千餘兩

收錢四十一萬八千餘串

四川省

共收銀四十五萬餘兩

廣東省

共收銀一百七十四萬餘兩

廣西省

共收銀五十三萬六千餘兩

雲南省

共收銀三十二萬三千餘兩

貴州省

共收銀二十五萬兩

以上總共收銀一千零七十萬零九千餘兩總共收洋  
一百八十八萬五千餘元約合銀一百三十七萬六千  
餘兩

總共收錢五百五十四萬八千餘串約合銀三百七十  
萬兩

統共約合銀一千五百七十八萬餘兩

遵 旨妥議粵漢鐵路辦法並鈔呈美國借款合同摺  
光緒二十八年五月 鄂督張粵督陶會奏

奏爲遵

旨妥議粵漢鐵路辦法並鈔呈美國借款詳細合同以  
保利權而爭先著恭摺馳陳仰祈

聖鑒事光緒二十四年正月二十二日承准軍機大臣  
字寄正月初五日欽奉

上諭王文韶張之洞盛宣懷奏粵漢鐵路緊要三省紳  
商籲請通力合作以保利權並籌議借款各摺片現在  
時局日亟所有中國緊要枝幹各路除盧漢業經開辦



外粵漢一路應豫爭先著仍歸總公司總其綱領凡造路之資本借款之辦法通行之章程必須與盧漢公司一氣貫注始可收通力合作之效着王文韶張之洞等隨時會商盛宣懷妥議招股借款等因欽此遵

旨寄信前來

臣

等先期會商以各國鐵路惟美最新距

華最遠尙無利我土地之意總公司經營盧漢卽擬借美債嗣以該國商人求利較厚改而他謀粵漢則以英法各有覬覦權衡利弊之重輕自以籌借美款爲妥貼出使大臣伍廷芳熟悉西例而又籍隸粵東與此路有桑梓休戚之誼經咨商就美與合興公司議訂借款草

約十五條擇要電奏光緒二十四年三月十二日奉  
旨粵漢路款着照議訂定欽此並由總理衙門電知伍  
廷芳欽遵畫押蓋印在案旋經美國總理工程司柏生  
士等照約來華逐節測勘以草約原定借款英金四百  
萬鎊不敷築辦復派美律師坎理前來與臣宣懷續行  
籌議所送條款較原約多所異同經臣宣懷聲明權限  
詳細斟酌審適因展

覲入都就近呈送總理衙門暨路礦總局覆加察核因  
該律師尙須攜回美國交其總董酌定以伍廷芳議押  
在先應歸一手校正函電紛馳筆舌並瘁磋磨數月始

定續約二十六條維時拳匪事起京城文電不通伍廷芳來電以外侮日亟萬一悔約另議將來要挾更多並恐英法起而相爭擬請遵照

前旨將所訂詳細合同趕緊畫押俟事局大定再行奏請

批准前大學士兩廣督臣李鴻章與臣之洞臣宣懷往

返電商卽電復伍廷芳於光緒二十六年六月在華盛頓照前畫押蓋印以免別生枝節仍於合同內聲明恭候

諭旨批准咨明總理衙門在案此粵漢鐵路美國借款

曲折就範之大概情形也伏查廣州至武昌經行湘楚  
銜接盧漢勘測幹路枝路接長至三千餘里訂借美國  
金洋四千萬兩查照正約九扣交付週年五釐行息美  
公司至少分四次按工程所需次第而售小票以出售  
先後爲起息日期以免虧息將來工竣之日借款如尙  
有多餘或贖還小票或備付息款或未批少借皆可按  
約照辦設無意外之事全路五年造成未成之前動用  
本銀付息完工以後將行車進款付息並可陸續隨時  
取贖小票此票均撥抵以五十年爲期如二十五年內  
總公司別有鉅款向其取贖祇須先期知照酌加餘利

路用材料先儘漢陽鐵廠承辦遇調兵運械振饑諸要  
務減收車價儘先做運關涉損礙

國政不准運用凡係應收權利可以嚴緊鉤勒者無不  
盡力鉤勒並以借款造路必須招股自購路基以固根  
本又訂明就上海總公司設立總辦管理處除洋總工  
程司外由督辦大臣遴派幹員二人作為總辦輔以洋  
員二人凡造路行車用人辦事悉由該處會詳核定此  
美款續約緊要節目分明權限之大概情形也二年恭  
值

迴鑾溥海慶幸美公司先期電告開辦工款業經籌足

三百萬金圓遴舉洋員葛利以駐華代理人兼總工程  
司於本年三月間抵滬與臣宣懷料理開工議從廣州  
入手臣模自應欽遵光緒二十六年五月初十日

上諭鐵路係國家所造設有奸民煽惑擾害卽行按律  
懲辦等因飭屬妥慎保護早瞻厥成藉以仰副

朝廷經營同軌銳意自強之至意除按照盧漢鐵路擬  
定借款小票格式咨送外務部查照外謹將詳細合同  
繕具清單恭呈

御覽仰祈

聖明鑒核批准卽由臣等咨請外務部照會美國駐京

使臣彼此按照合同辦理所有籌定粵漢鐵路美國借款候

旨批准緣由謹合詞恭摺馳陳伏乞

皇太后

皇上聖鑒訓示謹

奏 六月初四日奉

硃批外務部覈議具奏單併發欽此

估修稅則完竣摺光緒二十八年七月 商務大臣呂會奏 江督劉鄂督張會後銜

奏為派員會同各國議稅使臣估定切實值百抽五進口稅則繕訂成冊恭摺具報仰祈

聖鑒事竊臣等先後奉

命辦理商稅事宜准英國日本國所派商稅專使馬凱日置益等美國所派專辦稅則使臣沙爾德暨德法等國所派駐滬總領事請派員會同按照和約大綱第六款內載進口貨稅增至切實值百抽五所有向例免稅各貨除外國進來之米及各雜色糧麵並金銀以及金銀各錢外均應列入切實值百抽五貨內又載將現在



照估價抽收進口各稅凡能改者皆當急速改爲按件抽稅幾何又載爲估算貨價之基應以一千八百九十七八九三年卸貨時各貨牽算價值乃開除進口稅及雜費總數之市價各節將進口貨稅估定切實值百抽五修改稅則當卽遴委奉

旨特派隨辦商稅之稅務司賀璧理戴樂爾兩員前往會同各國議稅使臣悉心核辦

臣

等仍隨時督察均經

電明外務部戶部查照在案方開辦之初

臣

等以原定

前三年貨價正值低減之時現在金價大漲銀價愈落若仍照舊以銀本估稅喫虧甚大因洋貨均以金價爲

本應照金鎊估稅最爲平允飭據兩稅務司擬具節畧交馬凱等核議並電商外務部及兩江湖廣督臣查酌電復而馬凱等堅稱只能照和約所載辦法議稅人員無權用別法商議具文照會前來再四辯論馬凱等雖以所爭皆屬有理然非商稅人員所能議須由政府另商不得已照復接議聲明交議之件可在北京再議目下允所議之稅則姑作准行至中國與各國商允更改之時爲止等語仍留改金地步以爲後圖數月以來彼議價低我議價高各國亦意見參差極費計較刻甫就緒實已不遺餘力各國業皆允洽不能再有增損並酌

議修改稅則善後章程三條附列稅則之後以昭信守  
查善後章程第一款申明進口洋貨必有不及載入稅  
則者應按每值百兩抽稅五兩之例完納訂明估價之  
法以免臨時爭論第二款各國原開免稅項下凡印字  
書籍水陸各圖新聞紙各種貨樣及民人行李暨自用  
之物及民人家內雜用之物均列入免稅之內經臣等  
堅持未允僅許其圖籍新聞紙等准其免稅凡輪船所  
用油煤等物納稅後如實爲自用轉運下船則海關卽  
將已完之稅以存票發還其餘未准闕入又第三款重  
復申明食鹽不准販運進口及軍火軍械非有特准明

文不准進口一面鈔咨外務部戶部及兩江湖廣督臣  
查核再由部轉行總稅務司辦理惟美國沙使係專議  
稅則而來稅則一定卽欲回國催請先行簽字以便啟  
程除一面電請外務部代

奏請

旨並將稅則繕訂成冊咨送軍機處查核外所有估修  
稅則完竣美國沙使催請簽字緣由理合會同兩江督  
臣劉坤一湖廣督臣張之洞恭摺具陳伏乞

皇太后

皇上聖鑒訓示謹

奏 本月十七日奉

硃批外務部知道欽此

請建上海李鴻章專祠摺

光緒二十八年七月  
劉蘇撫恩會後銜

江督

奏爲已故大學士遺愛在滬公請建立專祠列入祀典  
恭摺仰祈

聖鑒事竊據在滬紳商候補四品京堂龐元濟候補五  
品京堂劉錦藻前福建臺灣道顧肇熙直隸候補道姚  
文棟河南候補道楊廷杲候選道嚴信厚前江西廬陵  
縣知縣李曾珂前四川三臺縣知縣楊德鏞候選同知  
張煥綸湖北試用通判曹基善等聯名呈稱原任大學  
士李鴻章上年歿於京師

朝廷篤念忠盡飾終之典備極優崇並准於京師及立

功省分建立專祠江甯蘇州已先後奏准在案上海雖非省會然爲李鴻章淮軍發軔之地又爲李鴻章開辦洋務商務之初基戰績成謨允宜報饗謹就見聞所及覩縷陳之當咸豐十年粵匪方熾悍賊陳坤書等攻陷蘇常與浙酋李侍賢犄角相應環逼上海一夕數驚時督師大臣曾國藩方克安慶團練大臣龐鍾璐等乞援於國藩國藩以上海爲用兵絕地審慎再三李鴻章毅然請行同治元年三月始挈孤軍自皖抵上海察其地勢背水戰士當死中求生非運奇無以制勝於是撫用客將改練洋槍並自造開花礮彈四月克嘉定青浦復

柘林奉賢五月戰於虹橋八月戰於北新涇九月戰於四江口履鋒喋血迭破賊巢旋攻崑山太倉節節進取內而收蘇垣復常郡以應金陵曾國荃之軍外而規甯紹克嘉興以應浙江左宗棠之軍淮軍由是與湘軍並聞天下其立功實始於上海一隅二年奏設上海方言館謂不專求語言文字務在探討外國兵刑食貨張弛治忽之大以逮測算之學格致之理制器尙象之法必能盡閱未譯之書乃能探賾索隱通微合漠識者趨之四年復於上海購備鐵廠奏設江南製造局曾國藩先所採辦之機器亦歸併此局厥後金陵天津福州廣州



漢陽諸廠次第興舉實師上海之成規旋移督直隸每謂今日當務之急莫若借法以富強強以練兵爲先富以裕商爲本上海爲商務總匯精心果力遙爲護持自握利源各著成績綜其大要則有三端一曰招商輪船局同治十年始議輪船商局眾情惶惑謂奪沙船生計李鴻章則謂洋輪攘利已久當籌抵制今倡辦華輪實爲國體商情財政兵力展拓基扃若不破羣議爲之必致盛舉中輟振興無日因奏借官本督率興辦由是內江外海權利漸次收回卒能買併旗昌公司局勢始克堅定其後該局屢遭傾蹙賴李鴻章百端維護以有今

日此成績之在輪船招商者一也二日電報局光緒五年李鴻章於大沽北塘海口建築礮臺始設電線以通天津傳達號令六年遂奏設南北洋電線自天津以達上海嗣接辦沿海陸線自上海以抵粵東其後東接韓線南接法線西接英線北接俄線中國內地各行省設線殆徧權利乃不爲他人所奪此成績之在電報者二也三曰紡織局李鴻章嘗論進口洋貨以洋布洋紗爲大宗苟不自仿造何以塞漏卮而利民用光緒八年招集商股在上海設局試辦延聘洋工改製機器行之十年復招商添本漸見興盛忽遭火燬奏請重加整頓設

法拓充更招新股就舊址設立總廠另擬分設十廠量  
內地之銷數定紗機布機之限制將使紗布之利永不  
外溢嗣因馬關新約盡弛各國製造之禁而華商遂致  
不敵洋商然猶幸留此基礎尙不至盡爲所佔此成績  
之在紡織者三也以上三事皆官督商辦李鴻章提倡  
保全不遺餘力收復利權既遠且鉅上下樂利遠近嚮  
風是其旋乾轉坤之功動關天下之安危生民之利病  
而綜其生平勲業實自上海基之生爲精誠貫注之區  
歿爲靈爽式憑之地馨香崇報於理尤宜擬於上海捐  
建原任大學士李鴻章專祠用崇祀典懇請代奏等因

前來臣伏念大學士李鴻章初受知於大學士曾國藩以幕府書生獨樹淮軍別幟當其駐營上海曾國藩雖信其調度有方然屢議令移駐鎮江取建瓴之勢李鴻章心知不可堅持不動卒蕝奇功虹橋四江口之役曾國藩報書有從軍十年未嘗臨陣手殲一賊今聞親臨督戰奏此奇捷旣愧且快等語崑新大捷曾國藩賀以書云向嘗疑上海非用武之地今乃知勝算非人所及其推許如此初至上海英法將弁催迫進兵輒拒不聽洋將意頗輕之久乃憚服加禮以改用外國兵械攻勦得力卽銳意規倣講求其時曾國藩亦派員赴英美各

國採訪船廠機器價值老成謀國蓋有同揆曾國藩又稱其以剛大作中正之氣以精思窺製造之術有鞭撻龍蛇視若嬰兒之風蓋指上海之設施也至於招商輪船電報紡織三端臣皆躬與其事知之尤詳曩值中外構釁輪局屢瀕於危李鴻章軍事方亟每令臣妥籌維護終底萬全毀折英丹已設之陸線訂立俄法各國接線之合同亦由臣參覈機宜據理爭議紗布機廠被燬臣方任津海關道當於津河封凍時赴滬整理拓充三十年來親承委任其間經營締構曲折纖悉必往復商榷歸於至當而後卽安溯甘苦之共嘗念規隨之有自

典型長謝感愴何窮茲據該紳商等呈請建立專祠遺  
愛深長不敢壅於

宸聽合無籲懇

天恩俯准於上海建立原任大學士李鴻章專祠

敕部列入祀典由地方官春秋致祭以彰蓋績而順輿  
情謹會同兩江總督臣劉坤一江蘇巡撫臣恩壽恭摺

具陳伏乞

皇太后

皇上聖鑒訓示祇遵謹

奏 八月初一日奉

愚齋存彙

卷七

五

硃批著照所請該部知道欽此

遵

旨另訂正太鐵路借款合同摺

光緒二十八年八月

奏爲正定太原借款興造鐵路作爲盧漢分支遵

旨歸併總公司另訂詳細合同辦理恭摺具陳仰祈

聖鑒事光緒二十八年八月十六日承准外務部咨開

會議山西巡撫奏柳太鐵路歸併盧漢總公司辦理另

訂詳細合同一摺奉

硃批依議欽此鈔錄原奏咨行到

臣

並先准函鈔山西

撫

臣

岑春煊原奏摺片暨原訂改訂各合同寄送酌核

前來

臣

詳加覆核此段鐵路發軔於正定府柳林堡附

近盧漢車站由幹分枝本甚利便俄商璞科第先與山



西商務局紳訂定合同延擱未辦改照盧漢辦法另擬  
條款赴部催訂撫臣部臣以晉路必辦時異勢殊奏奉  
諭旨飭臣詳細另訂則凡條目之操縱損益應以按照  
盧漢幹路辦法爲斷旣奉歸併總公司應收權利須與  
幹路貫注一氣詳細新約簽定原訂合同卽宜作廢庶  
鈐束專一不致兩歧臣奉

命以後俄商璞科第亦電囑華俄道勝銀行駐滬總辦  
就臣商辦沈思熟處磋商再三訂定合同二十八款又  
行車合同十款計直隸正定府至山西太原府應修支  
路約五百華里內分兩大段落第一節由正定至平定

州屬之平潭地方第二節卽由平潭至太原全路工程  
限三年告竣訂借法金四千萬佛郎克照現在市價約  
合華銀一千三百萬兩上下九扣交付週年五釐起息  
卽以該路進款作保查借款總數較原議爲多經與再  
三駁論據該銀行聲稱覆勘道路艱難工費照原估加  
增且路工未成之先息銀須在本銀內支付若不從寬  
借備恐中途停輟並據開送約估經費清單前來當於  
第十八款載明工竣借款尙有餘賸則所賸之款應繳  
還中國

國家第十九款載明購料用款細帳每三箇月造送總

公司查核路工應需各款所派總辦大員會同總工程  
司簽字憑單給發似此認真鉤勒當可杜絕虛浮至出  
售借款小票第十年起分二十年勻還造路期內就本  
付息路成以後逐年給息還本悉由進款提付期限屆  
滿款未全清訂明展緩以借款清訖爲止期限未滿中  
國別有大宗公款足償本息立時銷廢合同行車進款  
由我自收期內遴聘造路洋員須由督辦大臣核准華  
員於營造駕駛確能稱職亦可隨時指交委用機件材  
料先儘中國工廠承辦卽向外洋訂購亦須比緊價值  
凡遇調兵運械振饑等事照核定車價減半給發儘先

做運借款清還以後全路機器車輛一切完全妥善點  
交總公司照常行駛以上各節於用人事權限務極  
嚴明間與盧漢合同字句有削繁就簡之處則緣總公  
司先經請有部款正太支路則專藉借款雖移步而換  
形仍同條而共貫斟酌數四無可再商理合先繕具清  
單恭呈

御覽俟奉

旨批准再行簽印飭由該銀行選訂總工程司並會商  
山西撫臣遴派大員會同興辦至將來買地鳩工彈壓  
地方一切事宜應照山西撫臣原奏當由晉省任之以

期妥善除將該銀行所呈地圖並約估工程價單一併咨呈外務部查核外所有總公司遵

旨另訂正定太原鐵路借款詳細合同緣由謹恭摺具陳伏乞

皇太后

皇上聖鑒訓示謹

奏 九月初二日奉

硃批外務部覈議具奏單二件併發欽此

核減招商局承運漕糧水腳摺 光緒二十八年九月

奏為招商局輪船承運漕糧遵飭核減水腳據情懇陳

恭摺仰祈

聖鑒事竊 臣 前准戶部咨本年江浙漕糧統歸招商局

輪船承運惟運費應力從減省等因當即轉飭招商總

局前福建臺灣道顧肇熙前直隸通永道沈能虎儘先

候選道鄭官應等會同各商董悉心核議去後茲據該

局員董聯銜稟稱輪船運漕費用繁重自停給修艙一

項每屆墊支修費甚鉅又二成免稅一項亦經奏明全

數報効每屆更無可彌補統計運漕水腳並保險等費

在內每石已減爲三錢八分八釐一毫開銷各項實屬  
不敷逮庚子猝遭匪亂天津塘沽局棧均爲洋兵佔住  
員董等不能辦事祇得由英商仁記洋行代辦一切駁  
船扛力比較平時所費尤鉅現今天津交還用項能否  
酌裁尙無把握奉飭後遵與在局各商董籌議再三力  
求撙節惟本屆火車因造岔路遲至五月始行開運漕  
糧存滬日久折耗人工裝卸僱價又昂其運費實屬無  
從核減擬請自光緒二十八年冬漕起於向章每石輪  
船水腳保險等項漕平銀三錢八分八釐一毫內減去  
五分計每石漕平銀三錢三分八釐一毫永爲定章不

再核減並懇

奏咨立案等情前來臣查上海低窪之地漕米向係冬收春運近兩年因事擔擱滬局輪船起運太遲棧耗既鉅及運至塘沽又因洋兵未退費用倍於尋常二十六年二十七年兩屆招商局所領水腳不敷所出係屬實情本屆蘇漕開兌太古洋行遽肯減價攬運實爲攘奪權利起見是以英國日本議訂商約均欲將漕運列入約章臣等與外務部江鄂督臣電商未允所請查洋公司所收尋常商民運米水腳自滬至津每石收銀三錢七分零或增或減隨時漲落該洋行何以獨於漕米願



長江不遠 卷一  
減水腳可見別有隱衷招商局爲中國公司經前大學士李鴻章屢次奏准漕米悉歸該局承運亦有深意臣此次攷察中外情形官商兼顧按照招商局員董公同稟復自光緒二十八年冬漕爲始每石運費核減銀五分比較裝運商米實已輕減尙屬急公合無仰懇天恩飭下戶部立案施行除分咨江蘇浙江督撫臣查照外所有招商局輪船承運漕糧遵飭核減水腳各緣由謹繕摺具陳伏乞

皇太后

皇上聖鑒訓示謹

奏 本月 日奉

硃批戶部知道欽此

請設上海商業會議公所摺

光緒二十八年九月  
辦商務大臣張會後銜 督

奏爲上海設立商業會議公所遴派總董聯絡商情以  
植基礎而待擴充恭摺具陳仰祈

聖鑒事竊維中國商業之不振大率由於商學不講商  
律不諳商會不舉而三者之中尤以創設商會爲入手  
要端 臣曾於光緒二十六年十一月二十三日恭謝

天恩摺內附片陳明在案查泰西各國首重商務公司  
總會隨地而有日本維新之後亦於各城埠建商法會  
議所凡以通隔閼劑盈虛聯上下之情竭維持之力用  
能以商戰角勝雄視五洲中國自互市以來風氣日開

朝野士庶漸不至鄙商爲末務然通國商業逐年疲敗  
固由華商心志不齊視同業肥瘠漠不關心甚或詐僞  
侵攘互相傾擠以致洋商乘間伺隙益得操縱其技力  
而賸削我利權揣厥由來實亦官府未得保護提倡之  
法上下各不相謀所致遠規西制近採輿論商會之設  
誠非緩圖伏查光緒二十四年四月二十四日奉

旨飭令各省會地方設立商務局亦已開辦數年但局  
爲官設仍用候補人員不用商董未免官與商視同秦  
越商情甘苦終難上達於官以視各國商會用意大相

懸殊

臣

自奉

命以來駐紮上海查上海爲通商首埠洋商總會如林  
日夕聚議討論研求不遺餘力而華商向無會議公所  
雖有各幫董事互分畛域渙散不羣每與洋商交易往  
來其勢恆不能相敵自非仿照洋商辦理仍必被團結  
而我散漫彼諳熟而我生疏彼盡得要領而事事占先  
我茫無頭緒而著著落後日復一日馴至利權坐失聽  
命外人商業決無復振之望臣私憂竊歎蓄之已久適  
奉

飭與各國專使改訂商約事宜於此舉尤有關繫益不  
容緩遂飭江海關道袁樹勛會同通商銀行總董候選

道嚴信厚傳集各幫商董首領議立總會眾情欣洽詢  
謀僉同卽由該道嚴信厚籌墊經費賃屋一區先行開  
辦定名曰上海商業會議公所卽派嚴信厚爲該公所  
總理另由嚴信厚及各業公舉道員周晉鏞爲副總理  
常川駐所辦事該二員精於綜核熟悉商情其平日聲  
望素爲滬上各商所信服畀以斯事當能措置裕如並  
一面刊發木質關防以資信守旋據呈閱暫行簡明章  
程尙稱妥洽並選舉各業商董議員亦均公正可靠臣  
復督飭該總理等實心經理痛除官場習氣隨時隨事  
會集各商切實考求利弊並定常會大會特會之期臣

亦與各該員董商人不時接見從容坐論勿苛儀節以期融洽聯貫遇有應商應陳應爭應改諸大端准令各抒所見陳遞說帖稟詞以收集思廣益之功徐施補救挽回之術如此行之日久庶幾商情踴躍陳說日多上下之情親懋遷之羣合彼族見我官商一氣不似從前壅蔽隔膜遇有交涉關於商業者我若抗爭婉辯確有見地亦必較易轉圜似於商政要端不無裨益其餘各省會各通商口岸能否推廣辦理臣當與張之洞及各督撫隨時籌度至設立商務學堂訂定商律專條各節容再採取東西國規制需以時日漸行擴充以仰副

朝廷振興商務保護維持之德意所有上海設立商業會議公所並遴派總董經辦各緣由謹會同督辦商務大臣調署兩江總督臣張之洞合詞恭摺具陳伏乞  
皇太后

皇上聖鑒訓示謹

奏 本月 日奉

硃批政務處外務部知道欽此



淞滬鐵路工竣造銷摺光緒二十八年九月 直督袁

奏為鐵路總公司建造淞滬鐵路工竣收支經費列作

第二起接續造銷繕具清單恭摺仰祈

聖鑒事竊臣於光緒二十八年二月報銷總公司盧保

鐵路工款收支摺內聲明另案

奏辦淞滬鐵路撥支官款隨後接續造銷各清各款等  
情經外務部戶部核議照准覆陳奉

旨依議欽此欽遵在案伏查風氣流行視鐵路為推展  
華洋輻輳以上海為匯歸此後接軫蘇甯鉤銜津鎮西  
北供億取諸東南惟收效為至閎故造端尤宜審通商

總埠租界雜居地值奇昂日增月盛鐵路爲萬國通行公例教地洋產不容稍有扞格計自上海車站起經靶子場江灣鎮張華濱以迄蘊藻濱南岸止行車正路連同往來相避岔道接長軌路四十六里八成四分內造鋼橋六座大小水溝涵洞二十一道洋式車站五處此外轉盤水櫃機廠車廠以及推闢馬路分布道房爲各國觀聽所繫均未便稍從簡率臣延訂德國工程司錫樂巴派委江蘇候補知府蔡匯滄分任辦工購地事宜凡外洋料件照章開標定價擇廉訂購匠夫工資並內地採辦物料悉令華洋工員會同簽字呈候考核行車

以後中外翕然稱頌利便所收車價逐漸增多此段鐵路原議築至吳淞燈塔爲止下建深水碼頭庶番舶雲屯轉輸靈捷祇因其時自開商埠察度吳淞商務未能遽臻繁盛總公司撥領官款以注重幹路爲亟不敢另請部撥上煩

宸厯其測量標杆以內除吳淞官塘灘地八十餘畝尙須咨商南洋大臣撥歸路用外其餘蘊藻濱北應備建造機廠地基悉已寬籌預購目前正在架橋過河接展軌道所用經費自應另案附銷以清起訖未便因正路已成稍涉延緩據總公司購料處道員朱寶奎工程局

知府蔡匯滄等督同總公司造冊處委員核造淞滬鐵路四柱收支總細各冊開具簡明清單列爲總公司第二起報銷詳請奏咨核辦前來臣詳加覆核其舊管項下上屆結存庫平銀三百八十四萬九千一百十二兩九錢三分四釐九毫新收項下截至光緒二十七年十二月止車腳進款合庫平銀十六萬八千二十八兩九錢九分一毫管收兩項實合庫平銀四百一萬七千一百四十一兩九錢二分五釐開除項下購地造路置備車輛養路歲修共計六十四款實支庫平銀一百二萬二千三百八十七兩八錢二分餘存官款二百九十九

萬四千七百五十四兩一錢五釐內先經

奏准預支漢廠軌價藉杜洋軌漏卮除造軌作抵外結  
至光緒二十六年十二月止漢廠實預支總公司軌價  
一百三十一萬九千六百餘兩應俟隨後分起接續造  
銷以清款目除清冊咨部外謹援前案繕具清單恭呈  
御覽仰懇

天恩飭下外務部戶部暨路礦總局查核准銷所有總  
公司建造淞滬鐵路工竣作為第二起造銷緣由理合  
會同直隸總督臣袁世凱調署兩江總督湖廣總督臣

張之洞合詞恭摺具陳伏乞

皇太后

皇上聖鑒訓示謹

奏 本月二十一日奉

硃批該部知道單併發欽此

謹將鐵路總公司建造淞滬鐵路工程收支經費繕列  
簡明清單恭呈

御覽

計開

舊管

一存盧保鐵路第一起銷案應存庫平銀三百八十四  
萬九千一百十二兩九錢三分四釐九毫

新收

一收淞滬鐵路車價進款庫平銀十六萬八千二十八  
兩九錢九分一毫

共計管收兩項庫平銀四百一萬七千一百四十一兩九錢二分五釐

開除

一支購地項下計一款動支經費庫平銀十一萬九千三百六十九兩四錢二分五釐二毫

一支造路項下計三十九款動支經費庫平銀五十八萬八千八百三十九兩五錢八分三釐三毫

一支造車項下計三款動支經費庫平銀十四萬七百二兩四錢五釐九毫

一支養路歲修項下計二十一款動支經費庫平銀十



七萬三千四百七十六兩四錢五釐六毫

以上共計六十四款動支經費庫平銀一百二萬二千三百八十七兩八錢二分

實在

一應存庫平銀二百九十九萬四千七百五十四兩一錢五釐內有漢陽鐵廠預支軌價一百三十一萬九千六百餘兩均俟接續抵支另案造銷合併聲明

愚齋存稿卷第七